



## ***Komunikadu Imprensa***

***Periodu : Setembru 2011***  
***Publikasaun : 4 Outubru 2011***

### **JSMP Kontinuasaun Fasilita Treinamentu ba Lideransa Komunitária iha Sub Distritu Atauro**

Iha loron 21 fulan Setembru 2011 JSMP liu husi Unidade Asistencia Legál ba Vítima (VSS), hala'o treinamentu iha Suco Macadade, Sub Distrito Atauro, Distrito Dili. Partisipante ba treinamentu ne'e maka hanesan xefe suco, lia nain (*ancião*), xefe aldeia, grupu fetu, reprezentante juventude fetu no mane inklui mós komunidadade. Total partisipante sira hamutuk 35 ne'ebé kompostu husi fetu 17 no mane 18.

Materia treinamentu sei kontinua nafatin hanesan treinamentus sira ne'ebé halo ona iha distrito seluk. Materia hirak ne'e foka liu violensia bazeia ba jéneru ligadu ho lei nasionál no internasionál inklui mós konabá provizaun balun iha Konstituisaun konabá Prinsipiu Estadu Direitu no Prinsipiu Igualdade Jéneru. Nune'e mós knaar autóridade judisiáriu hanesan (juiz no prokurador) nomós ajente prosesuál sira hanesan (Polísia- VPU, Defensór Públiku no Advogado/a) sira.

Diretór ezekutivu JSMP, Luis de Oliveira Sampaio informa katak, *treinamentu ida ne'e realiza iha Suco refere ho objetivu atu hasa'e koñesimentu ba lider komunitária inklui grupu fetu, juventude no komunidadade konabá prosedementu sistema justisa formal iha Timór Lésté, liu-liu kazu violénsia bázeia ba jéneru.*

Aleinde ne'e, nia mós hatutan tan katak programa treinamentu ne'e hanesan pasu ida importante hodi aktualiza no disemina informasaun ba lideransa komunitária hodi kontribui ba justisa iha prosesu prevensaun ka eliminasaun violénsia bázeia ba jéneru ne'ebé mak aas iha Timór Lésté.

Treinamentu ne'e hala'o ho maneira diskusaun nakloke atu nune'é partisipante sira bele ativu iha prosesu nia laran. Aleinde ne'e mós bele fo oportunidade ba partisipante sira atu espresa sira nia esperiensa pasadu, liu-liu mekanismu atendentu ba kazu violénsia bázeia jéneru iha sira nia suco laran.

Husi prosesu ne'e JSMP nota katak, koñesimentu partisipante sira ba matéria ne'ebé maka aprejenta husi fasilitador sira mínimu teb-tebes.

Iha sesaun enseramentu Xefe Suco Macadade hateten katak, sira sente kontente tanbá bele hetan ona treinamentu husi JSMP konabá atendentu ba vítima violénsia bázéia ba jénuru. Aleinde ne'e mós bele ajuda sira nia estrutura tomak iha suco laran hodi kompriende konabá sistema justisa formal iha Timór Lésté inklui mós sira bele separa kazu krime ho kazu sivil.

JSMP espera katak ho treinamentu ne'ebé maka hala'o ona ne'e bele ajuda hodi hasa'e koñesimentu no kapasidade ba lider komunitária sira hodi bele ajuda vítima violénsia bázéia ba jénuru hodi asesu ba iha sistema justisa formal. Parte seluk bele redus siklu ou número violénsia bázéia ba jénuru ne'ebé mak agora aas iha Timór Lésté.

Treinamentu ne'e realiza tanbá hetan ajuda husi USAID liu husi The Asia Foundation.

Atu hetan informasaun kle'an favor kontaktu:

Luis de Oliveira Sampaio

Direitór Ezekutivu JSMP

Email; [Luis@jsmp.minihub.org](mailto:Luis@jsmp.minihub.org)

Landline; 3323883/7295795